

榮縣志卷十八

輿地志

風俗

自文翁化蜀治比齊魯

本朝道一風同雖僻遠無不服教而嘉屬榮邑尤稱淳厚尙
儉樸稀爭訟今稍遜於昔時是在宰治者與鄉士大夫
共挽其波也志風俗

圖經云有簡儉風

隋志敏慧慕文學

原志地曠人稀民良俗樸

榮縣志

卷十八

輿地志

風俗

一

州志民勤稼穡

古州志民多樸實士尙詩書

宋張仲記界屬東西無桑麻以便農無舟楫以便商昔
以鹽利富饒號爲東州道院謂其民淳事簡可以道化
國初民情古樸自他省入籍者惟務恆產古樸尤甚距今二
百年來涵育薰陶更知向化

士習百年以前讀書家不多置經史近漸次務根柢敦
實學立家塾延師課讀或於鄉館公請一師加以書院
義學肄業有地奮志者甚多

民風男事農功女勤織績愚者守拙黠者爭利貧者自

食其力富者專事田畝惟每年將穀盡糶少積貯爲可慮也

農事以積冬水爲要在山者修堰塘近河者置筒車以資灌溉種棉多者秋收時近隣貧家婦女皆來幫工主家執秤照所拾輕重給錢

女工鄉居則事蠶桑紡織城居則多習鍼工

商賈以貢井鹽商爲最其餘或列肆居奇或囤積販賣大利所在陝西江西人居多土人則十之四焉

衣服冬多用棉夏多用紵麻華服者不多見

飲食無珍錯白米而外或兼用雜糧番薯酒有常酒釀

榮

縣志

卷十八

輿地志

風俗

二

糯米爲之有燒酒膏粱爲上玉麥俗名包穀次之

冠禮久廢然士夫家於行婚禮之前夕設醮位擇顯貴或尊長加冠命字鼓樂拜其祖先父母以及眾賓眾賓乃以花紅致賀遺意猶有存者

婚禮先請媒妁傳言旋備禮填庚換帖娶期定備禮請媒氏報知女家臨期婿家仍請媒氏偕族屬將禮往迎以香燭牲酒告於女家之祖女家兄弟戚誼送女升綵輿來婿家婿候綵輿至出大門外三揖迎綵輿入堂內女出輿與婿行交拜禮既昏拜祖先父母及尊輩乃入洞房娶前一日婿家花燭女家花宵各有夜宴本日謂

之正筵明日女家請女婿謂之回門宴

喪禮有知遵家禮者而競修佛事者多否則眾皆非笑
弔客至輒分以白布裹頭亦有不盡然者惟祭奠則通
行焉

祭禮城市朔望必祭鄉村則罕有祭者元旦上元中元
下元以及端午中秋除夕忌日誕辰祭於家清明祭於
墓皆無常品惟清明必采甜艾爲糕亦猶端午用角黍
中秋用月餅循爲成例矣

祈禳正月人日後各祠廟皆然火樹各門首皆點紅燈
謂之天燈寓人壽年豐之意兼仿古人儺禮鳴金執挺
以驅瘟疫謂之獅燈場市仲春設清醮建火醮田家季
春有穀花醮卽賽田祖意也

慶賀婚娶則賀以花紅生子則送粥米送雞與雞子布
幅者尤多老人壽辰每於晉一之歲製錦爲祝或僅送
酒肴衣服等物

賽會正月初十日土主會士女雲集四月初八日大佛
會進香五月二十七日城隍會昇城隍神出遊有還愿
者隨其後以扇扇之

歌謠農夫栽秧有歌石工輦石亦有歌一人倡眾人和
取其可以忘勞可以齊力至於村童牧豎信口謳詠謂

之山歌雖近鄙俚亦足徵鼓腹含哺熙熙皞皞景象

榮縣志

卷十八

輿地志 風俗

四